



KATA PENGANTAR



**PERDANA MENTERI
MALAYSIA**

Virus COVID-19 yang mula menular sejak Mac 2020 terus menggugat kehidupan dan mata pencarian berikutan gelombang jangkitan baharu di seluruh dunia lantas memaksa pelaksanaan semula langkah pembendungan bagi mengekang penularan wabak tersebut. Malaysia juga tidak terkecuali. Kerajaan terpaksa mengisytiharkan perintah darurat sementara diikuti dengan Perintah Kawalan Pergerakan (PKP) penuh di seluruh negara pada pertengahan tahun ini. Langkah tersebut bertujuan melindungi nyawa rakyat dan meredakan tekanan ke atas sistem kesihatan awam negara. Pelbagai langkah kawalan yang dikuatkuasakan seperti sekatan perjalanan domestik dan antarabangsa serta larangan beroperasi bagi industri perkhidmatan berasaskan aktiviti bersemuka menyaksikan hampir kesemua sektor ekonomi terjejas. Oleh yang demikian, unjuran pertumbuhan KDNK bagi 2021 telah disemak semula antara 3% hingga 4%.

Bagi mengurangkan kesan negatif ini, Kerajaan telah mengambil tindakan segera dengan melaksanakan pemberian bantuan dan pakej rangsangan ekonomi berjumlah RM530 bilion sejak penularan pandemik COVID-19 dengan RM225 bilion diperuntukkan pada 2021. Dalam tempoh 19 bulan ini, pakej bantuan dan rangsangan ekonomi tersebut telah menyelamatkan 2.7 juta pekerjaan dan memanfaatkan lebih 20 juta orang dan 2.4 juta perniagaan.

Saya sangat yakin bahawa keadaan akan bertambah baik. Pelaksanaan Program Imunisasi COVID-19 Kebangsaan (PICK) yang diberi fokus oleh Kerajaan telah mengurangkan tekanan secara beransur-ansur ke atas kadar kemasukan pesakit ke hospital dan unit rawatan rapi (ICU) pada September 2021. Keyakinan ini diperkukuh dengan Pelan Pemulihan Nasional (PPN) yang memperincikan strategi jelas untuk keluar daripada pandemik ini secara selamat dan bersestematik berpandukan sains dan data yang sahih. Meskipun berhadapan dengan isu bekalan vaksin pada peringkat awal, momentum PICK kemudiannya menjadi lebih pantas seterusnya mempercepat jangkaan penerimaan dos lengkap vaksin bagi populasi dewasa negara menjelang akhir Oktober. Lebih banyak sektor ekonomi dan aktiviti sosial juga telah dibenarkan beroperasi secara berperingkat apabila kes COVID-19 yang serius terus berkurangan.

Dengan nilai ambang PPN bagi setiap negeri diurus dan dipantau secara rapi, ekonomi domestik dijangka dibuka sepenuhnya pada suku keempat 2021 dan meneruskan trajektori pertumbuhan prapandemik menjelang 2022. Kerajaan komited untuk memastikan kita kembali pulih pada tahun hadapan disokong oleh Bajet 2022 yang memberi tumpuan dalam memacu pemulihan ekonomi, membangunkan semula daya tahan negara dan memangkin perubahan.

Sebagaimana kita berhasrat untuk mencapai pertumbuhan ekonomi dalam jangka masa pendek, Kerajaan juga komited bagi memenuhi agenda reformasi dan pembangunan negara yang lebih besar seperti yang digariskan dalam Rancangan Malaysia Kedua Belas, 2021 - 2025 (RMKe-12): Keluarga Malaysia - Makmur, Inklusif, Mampan. Sehubungan itu, Kerajaan akan terus memacu pertumbuhan negara dalam jangka masa sederhana dan panjang melalui pelaksanaan dasar seperti Dasar 4IR Negara, MyDIGITAL (termasuk pelaksanaan 5G), Perumahan Mampu Milik, Pendidikan, Perubahan Iklim dan lain-lain supaya perkongsian dalam keupayaan menjana kekayaan yang lebih saksama dan matlamat kemampanan negara dapat dicapai seperti yang diwacanakan dalam RMKe-12. Asas untuk menjadikan Malaysia lebih berjaya, inklusif dan mampan juga akan direalisasikan melalui ikrar untuk menjadi negara neutral karbon menjelang 2050 serta melalui langkah perubahan yang digariskan dalam inisiatif Perkukuh Pelaburan Rakyat (PERKUKUH) diterajui oleh syarikat pelaburan berkaitan Kerajaan. Secara keseluruhan, Bajet 2022 akan menyokong semua dasar tersebut seterusnya memacu pertumbuhan jangka masa pendek di samping membina asas pembangunan masa hadapan dan yang lebih penting, daya tahan sosioekonomi.

Sungguhpun disokong dasar dan perancangan yang dijangka melonjakkan Malaysia ke hadapan, impak COVID-19 masih membelenggu seluruh lapisan masyarakat terutamanya bagi yang kurang berupaya menanggung beban. Pandemik ini terus memberi impak kepada rakyat secara keseluruhan khususnya perusahaan mikro, kecil dan sederhana serta industri seperti pelancongan dan perkhidmatan. Memandangkan terdapat keperluan untuk mencapai kemampanan fiskal, Kerajaan menyeru sektor swasta untuk turut sama menyumbang kepada pertumbuhan ekonomi dan pembangunan negara agar kita dapat mengembalikan semula kehidupan dan mata pencarian seperti sedia kala secepat mungkin di samping secara beransur-ansur menerima hakikat COVID-19 sebagai endemik.


Saya amat berterima kasih khususnya kepada para petugas barisan hadapan dan sukarelawan atas segala khidmat bakti yang dicurahkan tanpa mengenal erti penat lelah dan terutamanya kepada rakyat daripada semua lapisan masyarakat atas segala kesabaran, ketabahan dan kerjasama untuk tampil ke hadapan bagi menerima vaksin demi memastikan negara kita selamat dan sejahtera. Semakin pantas normalisasi dan pertumbuhan ekonomi dipulihkan, semakin cepat negara akan kembali seperti sedia kala. Kesemua usaha tersebut jelas membuktikan kesungguhan rakyat kita untuk bersatu hati tanpa mementingkan diri bagi memastikan pemulihan Malaysia.

Perjuangan memerangi COVID-19 masih belum berakhir. Kita tidak tahu apa lagi kejutan yang akan dibawa oleh virus tersebut pada masa hadapan. Namun, apa yang kita tahu adalah dengan berdiri teguh bersama-sama, kita bukan sahaja berjaya mengharungi antara episod yang paling mencabar dihadapi negara bahkan mempamerkan maksud sebenar semangat perpaduan rakyat Malaysia.

Melangkah ke hadapan, seandainya semangat juang tinggi rakyat yang dizahirkan sepanjang 19 bulan yang lalu dan persefahaman dwipartisan baru-baru ini merupakan sesuatu yang dapat dikekalkan, saya yakin tanpa mengira bangsa, warna kulit, kepercayaan dan ideologi politik, #KeluargaMalaysia akan menempatkan negara kita yang tercinta pada kedudukan yang kukuh dalam mengharungi perjalanan untuk kembali sembuh dan pulih agar kita boleh dan mampu memenangi sebarang perjuangan terhadap COVID-19 pada tahun mendatang, *Insyallah*.



DATO' SRI ISMAIL SABRI BIN YAAKOB
Perdana Menteri Malaysia
29 Oktober 2021



PRAKATA



**MENTERI KEWANGAN
MALAYSIA**

Memasuki tahun kedua penularan COVID-19, kehidupan rakyat masih lagi terjejas dan belum pulih seperti sediakala. Namun begitu, pengurusan program vaksin Kerajaan yang digabungkan dengan sokongan fiskal yang besar telah membantu mengawal pengangguran, memastikan perniagaan kekal bertahan serta melindungi golongan mudah terjejas sejak 19 bulan yang lalu.

Walaupun virus tersebut telah bermutasi kepada pelbagai varian, Pelan Pemulihan Negara (PPN) yang berpandukan sains dan data telah menunjukkan pencapaian yang menggalakkan. Negeri-negeri kini telah beralih secara beransur kepada fasa yang membenarkan lebih banyak aktiviti ekonomi dan sosial dilaksanakan. Perkembangan ini sudah tentunya sangat dinantikan oleh rakyat dan perniagaan.

Sebagai Kerajaan yang responsif dan prihatin, pelbagai inisiatif dilaksanakan untuk menyelamatkan nyawa dan mata pencarian rakyat, namun keseimbangan tersebut sukar dicapai semasa usaha pemulihan dalam tempoh kritikal ini. Walaupun berdepan dengan cabaran fiskal, Kerajaan telah menyediakan empat pakej rangsangan ekonomi iaitu PERMAI, PEMERKASA, PEMERKASA+ dan PEMULIH pada 2021 yang terdiri daripada langkah fiskal dan bukan fiskal berjumlah RM225 bilion atau 14.8% daripada KDNK.

Sehingga kini, kerjasama bersepadu oleh sektor awam dan swasta telah menunjukkan tanda pemulihan ekonomi yang memberangsangkan dengan peningkatan KDNK sebanyak 7.1% pada separuh pertama 2021 berbanding penguncupan 8.4% pada separuh pertama 2020. Nilai perdagangan negara bertambah baik, meningkat kepada 26% dan melebihi RM1.0 trilion pada separuh pertama 2021 dengan eksport dan import pasaran utama menunjukkan peningkatan.

Walaupun masih terdapat keperluan berterusan bagi langkah kawalan bersasar untuk mengekang penularan COVID-19, namun tinjauan ekonomi untuk separuh kedua 2021 kekal positif disokong oleh pembukaan semula sektor ekonomi dan sosial secara beransur-ansur. Perkembangan tersebut di samping peralihan lebih banyak negeri secara berperingkat ke fasa PPN berikutnya menyumbang kepada unjuran semula pertumbuhan ekonomi Malaysia antara 3% hingga 4% bagi 2021.

COVID-19 telah memberi beberapa pengajaran berharga dan mendorong kita menjadi lebih kreatif dalam memastikan pemulihan dan pertumbuhan ekonomi. Pertama, kita harus berfikir secara strategik bukan hanya dalam menangani COVID-19 tetapi untuk bangkit menjadi lebih berdaya tahan pascapandemik. Walaupun pandemik ini mungkin bukan yang terakhir kita akan hadapi, namun kita harus berusaha memastikan ini adalah kali terakhir kita terpaksa membuat pilihan antara menyelamatkan nyawa atau mata pencarian rakyat di mana kapasiti kesihatan awam diuji sehingga melepasi hadnya. Dalam erti kata lain, kita hendaklah bersedia menghadapi hari esok mulai hari ini dan kita laksanakannya dengan komitmen pelaburan yang mencukupi dalam penjagaan kesihatan awam.

Kedua, di samping mencapai matlamat jangka masa pendek untuk mengelakkan kemelesetan ekonomi, kita juga perlu mengambil peluang ini untuk menangani isu struktural jangka masa sederhana dan panjang. Dengan semangat tersebut, penting bagi kita mengambil kesempatan dalam krisis ini untuk menambah baik ekosistem penyampaian perkhidmatan awam; sekuriti pekerjaan, makanan dan sosial; serta keupayaan pendidikan awam dan perindustrian.

Ketiga, walaupun penerimgunaan digital adalah lebih pantas disebabkan oleh pandemik, namun jurang pendapatan antara bandar dengan luar bandar tidak akan dapat dirapatkan tanpa ditunjangi infrastruktur digital yang sempurna di seluruh negara. Ekosistem pendigitalan negara membantu menghalang ekonomi daripada lumpuh semasa pelaksanaan pelbagai fasa sekatan pergerakan. Kini, kita mesti berusaha untuk memastikan setiap rakyat Malaysia mempunyai keupayaan digital agar mendapat peluang yang sama untuk melibatkan diri dalam pembangunan negara. Inisiatif ini akan melahirkan generasi #KeluargaMalaysia yang kental untuk kekal kompetitif pada masa hadapan terutamanya melalui inisiatif MyDIGITAL.

Kita mesti menggerakkan negara ke arah ekonomi digital termasuk menerusi 5G, mengikut kesesuaian, selari dengan Revolusi Perindustrian Keempat (4IR) antara lain untuk menyokong norma baharu pekerjaan dan pembelajaran; pengurusan pandemik dan bencana yang lebih baik melalui data masa nyata; dan proses yang lebih kos efisien. Langkah ini juga selari dengan pembaharuan struktural jangka masa sederhana yang berterusan seperti rangka kerja Aspirasi Pelaburan Nasional (NIA) serta inisiatif Perkukuh Pelaburan Rakyat (PERKUKUH) untuk menyokong perkembangan ekonomi negara yang lebih mampan, memperkukuh sosioekonomi yang inklusif dan menambah baik kelestarian alam sekitar untuk jangka masa sederhana dan panjang.

Kerajaan akan mengutamakan ekonomi dan sumber pertumbuhan baharu bagi menjamin kesejahteraan rakyat pada 2022. Dasar fiskal mengembang akan dikekalkan untuk merangsang ekonomi dengan inisiatif Bajet 2022 menumpukan kepada mempercepat pemulihan, memperkukuh daya tahan ekonomi dan memangkin pembaharuan. Langkah ini juga selari dengan tema dan teras utama Rancangan Malaysia Kedua Belas (RMKe-12) yang baru diumumkan.

Melangkah ke hadapan, meskipun berhadapan dengan ketidakpastian, Kerajaan yakin bahawa ekonomi negara dapat bertahan daripada sebarang cabaran yang mendatang kerana mempunyai asas yang kukuh. Pertumbuhan KDNK diunjurkan berkembang antara 5.5% hingga 6.5% pada 2022 berikutan pembukaan semula sektor ekonomi dan sosial secara lebih menyeluruh serta peningkatan permintaan luar dari rakan dagang utama. Pemacu pertumbuhan lain termasuk harga komoditi yang lebih tinggi, persekitaran pasaran buruh yang bertambah baik, peralihan pantas kepada pendigitalan serta pelaksanaan projek infrastruktur dengan kesan pengganda yang tinggi.

Dengan hampir semua penduduk dewasa negara disasarkan lengkap divaksin menjelang penghujung Oktober, akhirnya kita dapat melihat sinar di sebalik pandemik COVID-19. Kepada seluruh rakyat Malaysia, ucapan terima kasih yang tidak terhingga dari saya atas sokongan anda dalam memerangi musuh yang tidak dapat dilihat ini. Namun, kita tidak seharusnya berasa selesa dengan kejayaan yang dikecapi kerana perjalanan kita baru sahaja bermula. Kita mesti terus bersama-sama membina semula keamanan dan kedamaian negara tercinta. Kesihatan, kesejahteraan dan kemakmuran #KeluargaMalaysia berada di dalam genggaman kita dan kita pasti akan menang bersama, *Insha-Allah*.





SENATOR TENGKU DATUK SERI UTAMA ZAFRI AZIZ

Menteri Kewangan

29 Oktober 2021

EKONOMI NEGARA 2022
pada harga malar 2015
(bahagian kepada jumlah dalam %)



¹ Termasuk perubahan dalam stok
Sumber: Kementerian Kewangan Malaysia

